



*Mort du Roy Isboseth ; & regne paisible de Daudid en Ierusalem
sur tout Israël.*

LES nouvelles de la mort d'Abner estans venuës au Roy Isboseth fils de Saül, Israël fut troublé aussi, & le fut encore davantage la maison d'Isboseth, à cause de deux Princes des larrons, nommez Baana, & Reccab, qui ayans trouué la portiere du lieu endormie, tuerent le Roy couché dessus son liët ; & porterent la teste d'iceluy à Daudid, qui les fit occire, pour montrer n'auoir pour agreables les meurtres faits par tels sanguinaires & assassins, & fit enseuelir le chef d'Isboseth au sepulchre d'Abner en Hebron. Adonc toutes les lignées d'Israël vinrent vers Daudid, disans ; Voicy, nous sommes tes os & ta chair : le Seigneur t'a dit, Tu paistras Israël : & les plus Anciens firent alliance, & oignirent Daudid âgé de 30. ans, pour Roy sur Israël, & regna quarante ans. En Hebron il regna sur Iuda sept ans & six mois ; puis s'en alla en Ierusalem, & prit la forteresse de Sion, où il fit son séiour, & l'appella la Cité de Daudid : Et regna là trente & trois ans sur tous ceux d'Israël & de Iuda. C'est où le Roy Hiram de Tyrie luy enuoya des bois de Cedre, & des ouriers pour trauailler à l'edifice que Daudid auoit fait commencer lors : Lequel reconneut que le Seigneur luy auoit confirmé son Royaume d'Israël ; & dés lors il prit femmes & concubines de Ierusalem, dont luy nasquirent plusieurs enfans. Les Philistins oyans les nouvelles du regne de Daudid, descendirent en la vallée de Raphaim, mais par deux diuerses fois ils furent combatus & vaincus.